

獨

漑

堂

詩

集

獨漉堂集卷之七

羅浮陳恭尹字元孝

小禹三集

新篁次吳大司馬

汗青猶可俟荏苒夕陽西高節含新籜清風滿舊溪掃
階林影薄拂水翠雲低會入伶人採憑添樂府題

聽鶯次吳大司馬

芳郊行竟日鶯語不曾無物色春將老離聲鳥亦殊緒
風吹近遠交影入烟蕪未免繁懷抱衰顏賴酒扶

贈李立齋總戎

作鎮炎方萬里清風流儒將早知名驛驅日永嘶長路
鼓角秋高滿郡城舊向詞壇稱繡虎曾從滄海射長鯨
盛年才擅兼資美麟閣遙開待勒銘

送鄭子源之香山

上林桃子洛陽梨更向增城問荔枝海內知君行欲遍
卷中多有故人詩

荔枝花事未曾闌作賦相如客倍閒好去臨邛尋令尹
橫琴山在海中間

龔雨亭都諫輓詩

乞歸連歲尙踟躇得請旋爲得疾初杜甫久聞焚諫草

所忠無復問遺書倚闌落日悲黃髮過嶺秋猿泣素車
臥病江干不能弔生芻一咏倍愁予

蔣雨亭主政來粵拜其先祖父祠部參政公遺愛
祠還日奉贈

何期旌旆到茅廬十載秦中一紙書方報循良徵北闕
却從休沐理南車兩旬旅寓青春淺三世論交白髮餘
酌酒先公祠下土于門高大信非虛

大江中隔嶺頭梅世澤偏深在粵臺山甫續戎今再見
相如乘駟此重來土風并是童時習人士多於祭日陪
握手別津亭思往事萬民爭送使星回

參政公擢河南督學萬民板轍送行之盛近代罕見

題山帶畫爲張宗肅

野橋枯石水磷磷幾疊蒼松似小春恰好贈歸詞客手
竹邊添个撚鬚人

送袁密山歸平樂

東來言送故人韶一歲維舟得此朝同是掛帆分兩地
西行人邇北人遙

年來歛盡舊鋒稜寓客門前冷似冰住久不知君是客
雪山如對坐禪僧

桂江山水極雕鏤奇峭參天帶急流便欲束裝從此去

唱酬三月共扁舟

題蕭叔兼行樂

草際相呼立渚禽茅堂蕭寂不須深圖書左右堪怡悅
脫屣浮雲物外心

題吳山帶瀟湘三峽圖送王紫詮使君之川南

君不見雙流江漢岷山來瀟湘九面衡岳開大別山前
神禹鑿長江東走如轟雷荆梁萬派此奔滙潮流千里
其艱哉君持旌節川南路一年理棹今方赴涉盡人間
翻覆瀾瞿塘灔澦寧堪顧吳生放筆爲此圖神光離合
超有無氣吞雲夢者八九筆挾造化爲前驅數峰便具

萬仞勢片帆直指蚕叢都巴東三峽定遠近耳邊似聽猿猱呼魚腹八陣日在眼峩眉古雪明高衢錦水文章多哲匠司馬楊王最其上千篇更有浣花翁兩表猶傳臥龍相羨君此去得其源繼美千秋豈多讓卽今吳生已入燕送行反在君行先君行向西伊向北我獨南滯朱明天人生聚散尋常事所惜詩篇遠難致作歌送君并索吳新圖分寄西南隅

梁聘妻黎貞女詩

天上修文帝闕深人間琴瑟不成音素車白馬來何事大節宏綱力自任同穴有期歸下土雙栖無夢到高林

生前未識郎君面不隔幽明是此心

走筆送梁台佐赴粵西幕府

書記翩翩昔所聞牂牁西去許從軍封侯本是書生事
銅柱高標在嶺雲

草堂過別語懸河俠士肝腸世未多前路有人能問我
一竿頭白對藤簾

賀梁藥亭新翁

七十顛毛未見絲百齡五岳豈云遲阿巢老鳳雙栖日
斗氣津龍始合時玉樹連行枝並發牙籤萬軸架新移
是日新館落成豪吟亦是東山事安石從來自敎兒

題佟子小影

鬱鬱長松謾謾風一囊更自抱絲桐知音豈患人間少
流水高山在目中

題陳子行樂

珠玉爲心貌亦如謝家芝草滿階除少陵一語堪爲贈
年少今開萬卷書

題潘子小影

柳底清陰竹葉杯諸峰遙入座中來人生樂事無過此
滿徑黃花對酒開

獻李提軍奠原

仙李盤根代有賢將軍名氏榜先傳官登八座今三世
祿自先朝幾百年嶺海喜過千里足日車新拜六龍鞭
安壞一借長城略滄海南邊得晏眠

萬乘旌旄狩朔邊國威還藉重臣宣金鞍久侍龍顏側
玉食頒從黼帳前每見借籌論戰伐時聞聚米指山川
一辭丹陛來南服御札黃封幾度傳

畫角風清靜海濤郊垌共喜見干旄金方氣肅崆峒壯
南斗功成日月高姬旦吐哺元自貴衛青揖客不言勞
天涯賤子能捫虱懷刺空慙有二毛

送林赤見北上兼柬吳山帶

鄉園籬菊已將闌馬上梅花北去寒豈謂少年須早達
只緣微祿好承歡水荒畿輔今聞熟隄潰河淮合漸乾
到日更尋年譜舊東風同向杏林看

送劉虛舟孝廉北上東史畊 岩學士

東去京華總及春青袍如舊榜名新詩篇好誦詞流口
先澤猶存帝里民祿閣分燈元漢裔黃梅傳鉢自江濱
漂陽學士聞聲久曾向人前問野人

潘母陳太君輓詩

涵觀之母

日暮誰能不倚闌夫人賢哲古無如介山隱日曾承命
江左行時未絕裾老去每聞加飯報病中猶寄緩歸書

天涯孫子分南北慟哭寒原走素車

送詹仙洲莫百川北上

數點寒梅漸報春嶺躉北去雪花新豐城並躍雙龍劍
燕市同游兩酒人道有屈伸權在命文無今古訣唯真
只須了却經生事一第何常可救貧

寄俞介石別駕

使君生有梅花約庾嶺羅浮屢剖符水部詩中頻共賞
美人林下未應無一枝春色聊堪寄兩地香風總不殊
欲掛片帆冬日下三楓亭畔對冰壺

題周耐菴匡廬托鉢圖

詩人標格老僧裝
大地無非選佛場
最是匡廬宜乞食
虎溪前去是柴桑

趙秋谷自潮州至卽歸其鄉詩以送之

春來望爾海東頭及到翻成送去舟嶺路過時梅未標
鄉園歸日麥應秋地畱勝跡供高咏天放閒身作遠遊
九土茫茫行已半後期相對又何州

送樊簡討崑來還都

論文連月得相親握手別臨期意倍真高蓋南來持節客
二毛憔悴種瓜人羽林舊籍同聲在桃李新陰異代春
書報高堂江漢上爲言滄海有遺民

送劉靜庵

貴竹千峰驥足開嶺頭五馬久徘徊漸看南國棠陰偏
却喜東風鵠首催漢武求賢期絕域燕昭來士有高臺
定知此去多奇遇誰得如君八面才

題憶雪樓江山無盡圖送紫詮王使君之官川南
次畱別原韻

東坡手書默化堂不知堂後山澤藏使君冷眼忽覩得
架樓收盡天蒼蒼樓基正與城頭敵窗外遠見風帆揚
我來艤舟此城下樓花飛落船頭香賓朋共識庾亮興
小民竊比燕公棠前軒後戶捲簾幙良宵勝日傳杯觴

雲峰四起若鄰並蒸炎三伏來清涼北窗企脚望不極
千疊萬疊皆山光象頭白水古佛跡朱明七洞仙人鄉
虹蜺隱見占雨至烟嵐出入因風狂聚如稠人互窺瞷
紛如舞袖相低叩天池鵬翼擊巨浪斗間劍氣明干將
雲陰穿漏或顯晦松聲斷續流清商不知漢晉是何代
陶鑄堯舜其粃糠常擬腰鎌刈葵藿每思寄夢炊黃粱
登臨萬象極富有忘却四壁和雕牆使君家在燕冀北
思親戀闕皆同方霞生想像斑爛綵屏列如對黼辰張
歸心欲躡雙飛燕省稼時乘五色羊擢巡西蜀忽畱滯
萬事險阻皆經嘗迴思樓上昔坐嘯明月直入無猜防

欲春靈藥問顧菟擬摘桂蕊呼吳剛安知俗態工具錦
遂使仕路成羊腸賴君雅志在吟咏南中久駐無嗟傷
溪山四遠皆遊陟圖書萬軸增丹黃集名憶雪三百首
隋珠卞玉森成行氣齊五岳爭聳峭才如海若奔汪洋
或于諧謔寓規諷時同星日舒光鋟浣花老潔可企及
劍南平易應來降此行所遇多古意筆仗况復俱精良
圖形盡歸大禹鼎切玉不啻昆吾鋼孤舟三峽上百丈
七年大郡宜輕裝西聽猿啼易寂寞北念鶴髮增徊徨
連天別緒語不盡數日解纜仍嫌忙膝前侍列子若弟
特達不異珪與璋移家暫寓虎踞石門巷復見烏衣王

離鳳長鳴協鐘呂宏音亮節皆琅琅東西各駕青雀舫
山水收以古錦囊巫山之高不可極長江之水難爲量
懸帆今月已春暮計程到日應秋陽送君不妨屢水宿
幾人同臥舟中牀問年我已踰耳順捋鬚君亦添新霜
九州宇宙本窄狹後期未可云渺茫將尋幽約指吳越
更攬宿莽過沅湘待君旌節自蜀出璽書惠下雲天長
新篇不厭讀數回老脚尙可同趨蹻且題此卷作後驗
恍如身復當樓窗迷濛遠近翠欲滴不辨揚越並燕梁
高歌激昂以贈我平生意興因飛翔安得如鳥有羽翼
從君唱和踰三瀧

走筆送程德基歸黃山兼懷其弟立方

一編圯下尙深藏愛寫仙人肘後方朱邸每因游宴入
白頭仍爲著書忙徘徊五嶺誰爲伍歸去黃山菊正黃
介弟到來今十載報書應訝懶嵇康

柬吳拔菴元戎

菊時曾得奉金鐘竹裏相尋惜未逢新句近知添俊逸
歸心還望許從容城開百粵三千里峽東長江數百峰
大樹清陰人共望白頭休謝酒泉封

送李竹君廣文之官香山

半日風帆到有餘江城原亦是山居似過別墅之鄰邑

却借閒官讀父書

尊人著天山草堂

李下蹊成垂蔭遠蓮峰秋

好着花初交君三世今頭白重見南溟化巨魚

令祖銓部公成

進士于崇禎庚辰予時十歲見之今去庚辰三年耳以此相期

送顧瑞長司教澄邁

去歲龍門點額迴魚牋寄我報難裁尙懸白璧連城價
今見珠厔絳帳開海國晴空標五指郡山回首望三台
天池自是鯤鵬地看爾搏風擊浪才

送呂載蕃歸山陰

風木蕭蕭滿若耶暑中遙汎獨歸槎東山臥挹千岩秀
南國新畱幾縣花血淚自霑慈母線黃扉人識相臣家

白頭相送渾忘老計日還迎駟馬車

海珠寺謁李忠簡公祠追次先府君韻

誰移古寺到波心往哲遺踪竟至今珠號摩尼從佛得
江浮明月正東吟一丘偃蓋情何遠半壁河山澤尙深
四百餘年存俎豆清風猶自滿雙林

百年能立卽千春不朽天南代有人痛哭書生曾伏闕
出師丞相亦綸巾遺篇在卷難爲和往事傷心莫可陳
文獻比來凋落盡餘光今幸借西鄰

忠簡裔孫興漢
重刻海珠志

賦送顧禹

新秋嶺外好迴車水湛長江落木初已啖離支三百顆
釣竿須鱠四腮魚

二毛一變作霜巔不聽吳歌四十年君到山塘秋已半
千人石上月依然

口上送家木月

久客將歸日新秋暫泊船別離良不易鬚鬢各蒼然鄉
酒鱸登市邊風雁在天家庭多樂事莫忘尺書傳

送學使王十州復命

梧桐一葉報秋生霜節隨君恰到京五嶺誕敷文德地
九重親賀聖功成帆開別浦旌旗色身拜彤墀珮玉聲

莫謂使星從此遠卽看卿月萬方明

題笪瀛仙行樂

風度蕭然塵表姓名隱著圖間謂是竹中高士何殊海外仙山

寄賀蔡萃長之官昌邑

搏風羽翮久翶翔新綰銅符近海疆善交尙存平仲里
著書人識鄭公鄉天邊仙島三山見澗下清流萬歲長
況是京華來路嘉聲容易到維桑

圍獵圖爲王雲菴題

萬轡羣飛走玉驄數枝鳴鏞響珊瑚弓高堂益壯三軍氣

四壁如吹大野風

平沙圍獵合還開蹤指何常不用才自是將軍親閱歷
誰人繪得陣圖來

賀廣州馮使君

天懷高曠世誰如却爲酬知更剖符北闕除書來五嶺
東風遊興尙三吳新添詩卷傳人口舊管黔黎候旅途
家有傅巖先命在暫將霖雨到南隅

南北猶慳相見緣仁聲先自異方傳棠陰未剪靈山下
驥足曾開禹穴前莘野有勲仍相陟章侯世守亦承賢
今時盛事寧殊古白首寧忘墾史編

口占送向恬菴

歸舟暫泊五羊城一指相辭萬里行竟夜吟詩不成句
新鴻飛過兩三聲

送蔡漢長之官瀧西

吾儕何必嘆離居一札新傳最起予南北異邦爲政處
弟兄同日拜恩初令弟萃長同選得昌邑邑當海徼方游刃地僻
山中好著書瀧水東流三百里君詩容易到鄉閭

千將雄氣迴難干莫謂師儒是素飡駢驥取途須待飽
蛟龍爲雨貴能蟠百年况味嘗應徧萬里曾行眼亦寬
入道久知無別訣半安隨處總安安

爲王雲菴題知止軒

急流勇退復何人
知止空闢老氏言
豈似聖經知至善
修齊事業蓋乾坤

陶公止酒偶然歌止觀天台
又若何知止知君深得力
平生志本不求多

運心軒

相生奇正本無窮制勝全資整暇功
一矢雍容升揖地
甲兵千萬在胸中

哲思軒

哲人邈矣復何思
道德文章總我師
夜寐夙興勤所事

保身唯咏仲山詩

澹恬堂

上弦新月藹清暉
恬澹無營世所希
綠竹黃花秋正好
一觴遙唱鶴南飛

九日喜家紫馭至

短歌言別昔何時
塵路茫茫久繫思
一第相期君不負
十年重見我尤衰
雁來天外新成陣
菊試籬邊未滿枝
南海荒殘今更甚
高車從此又何之

題丁勗菴秋江垂釣圖

百年舒卷豈難期
七尺漁竿一釣絲
不擇水清魚少處

秋江端可鑒鬚眉

送盧達夫之任邵陽

湖南清絕古來稱君蒞南梁第一城雪色千重催去騎
梅花一路引行旌歸猿峒外生徒送迴雁峰前候吏迎
到日龍池高處望縣山先有故鄉名

呈左學使我菴

文風一變此南隅十郡生徒仰大儒海內聲華推二妙
卷中詞賦繼三都青天手放驚人鳥明月全收不夜珠
誰道盛明持節日門前修刺有潛夫

送人入夔州

欲折梅花寄一枝送君猶覺掛帆遲巫山巫峽三千里
春雪春風是到時

書札頻歸識遠情別來兩度見秋生旌旆西入巴人國
鎖鑰東臨白帝城三尺青萍占夜氣一篇黃石是家聲
盛年功伐尋常事好勒麒麟閣上名

贈宜新寧遜菴

百里仁聲滿郡中家門奕葉有重封勳名漢代推三傑
兄弟高陽號八龍紀竹已書天上史栽花新徧海頭峰
識韓有願非今日窮巷車聲未易逢

送盧卜子之官延平

溪山雄麗絕閩天記得曾遊四十年萬戶水聲分澗竹
一方城影落江船參軍自昔多閒日趨府今時得大賢
知子此行將有合劍津只在郡門前

繙葛程符氏殉節輓歌

請代何能格上天千秋同穴志元堅餘生枉作儀髦賦
一死當君屬纊前

送詹意友之潮陽扶其父祖旅櫬還閩

兩世遺骸漲海邊首丘唯賴子孫賢客來嶺外三千里
淚滴棺前十二年

水木根源有此身十年泉路不知春看君近淚無乾土

自有連舟解贈人

送王令詒赴都補官

老不出門行蹠躡只是年年送人別白鬚一別幾莖生
老筆難工反成拙猶記去年春酒開君馳駟馬從西來
四方明好日高會玉笙銀管宵中催是時君有潘州役
所至葱葱若遺跡今年相送入羅浮已謝爲邦作嘉客
豐鱷湖邊山繞城著書仍是舊經生封章却自天曹下
車馬還從帝里行珠江八月炎威解數幅蒲帆向風掛
路迥唯憑葉縣鳧舟輕欲笑均堂芥往時朋舊各分飛
賦別江頭老布衣雖乏驪珠佐行色猶當洗耳待金徽

賀家植普進士

嬌水淵源代有文江門家學更逢君長風破浪時千里
大翼翀天見五雲畫錦正宜孺子舞新篇超絕衆人羣
玉堂有客相期甚書札南來慰我聞

時郵至其座主樊翰檢書

送李檢討伯猷

程江歸到正秋新便掛輕帆北問津子舍暫違衣綵地
玉堂還作讀書人遊經萬里文增壯史在千秋筆貴真
嶺海邇來寥落甚相期風度繼先民

都門遙奉白頭歸四葉承歡世所希詩禮庭前時獨對

鵠鵠原上更雙飛年來多黍香醪美秋在澄溪鮆鯉肥
供膳有人行自得報恩唯補袞龍衣

贈張翁源泰亭

七葉金貂代有雄西銘家學紹無窮奇文早已傳天上
黃綬新垂出漢宮邑近曲江唐相度地連韶石舜絃風
期君手播靈池水仁壽同依樂國中

送李麗侯司教化州

絳帳新移溟海頭之官尤喜及清秋仙山家近傳仙李
化雨飛時又化州出篋篇章珠徑寸趨庭詩禮雪盈頭
知君四世承歡在不羨京華作宦游

送何叶文入都

獨騎匹馬向燕臺便是閒遊亦壯哉中路詩情生白雪
一年歸計及黃槐都人尙繫漸離筑上客難逢郭隗才
縱有知音在霄漢高堂屈指待君回

送余振西梁凝掞入都

鳳城裘馬自輕肥少俊今時似子希詩禮庭中推二妙
扶搖風裏羨皆飛南辭庾嶠桐初下北到金臺雁始歸
好及弱齡承祖武老親猶着老萊衣

欣賞齋見吳山帶畫

欣賞齋中賞不希故人遺墨一沾衣雙鳬出洛翎猶濕

高柳搖風絮尚飛

贈李植公行樂圖

碧欄干外敞雲屏一簇笙簫在水亭傳語佳人誦新句
李郎停筆酒初醒

橋西新水縠文生洞府神仙境最清一炷名香烟未散
梧桐深有下棋聲

贈家天池

昔君十五青青衿姿顏如玉能鼓琴再三祈請一揮手
四座賓客皆傾心尊君虬鬚古俠客坐擁樓船通絕域
我從海外一見之及到君堂始相識酣歌永嘯樂未終

其如世事猶洶洶君挽長弓射白雁身騎大馬能追風
珊瑚合星漁人網姓名忽列鷹揚榜北臺買駿尚懸金
西郭栽花還自賞蹉跎五十鬢未霜有子能詩與父長
看君不復愁衰老唯憂無以答蒼蒼去年薦飢民最苦
四郊就賑愁風雨君慕蓬茅數十區瘠子愁妻各其所
荒原或有不歸魂掩之以棺埋以土吁嗟乎使君食祿
就一官職守所拘寧有補不如逍遙落拓作閒人足使

飢羸有寧字

題鈕高明玉樵行樂圖

名在循良世莫如天南鳬鳥到方初傳來詩句工尤甚

閒倚欄干未廢書

家子笠澤接香溪何地堪樵亦偶題一令山城最深處
西樵七十二峰西

賀高郡丞攝番禺

葭管動飛灰梅花處處開寒輕滄海上春自一陽迴霽
色明雄郡懼聲滿越臺雙鳬仙令地五馬使君來蒞政
垂三綬兼人備四才剖符雖疊疊遊刃更恢恢好尙從
寬猛風雲待化裁看公經緯畧計日列三台

題贈閔萃庵

閔子大隱流其性何澹蕩不知十八灘何如古汶上

送佟恩平赴都補官

仁聲十載徧炎陬春草生時共獻酬車蓋更飛何處雨
風帆今到海門秋多收端石經年鑿偶聽吳歌永夕留
滿載奇書竟篋笥未敎人識是虛舟

次答朱穎實

家集年來徧粵洲因君彌復景前修孤忠有後今三世
一面相期隔幾秋吳粵雲山非異地紀羣夙昔許同遊
未緣披豁聞高論詩句多爲第一流

別羅雄州水裕

梅花嶺上一麾偏南北清風二十年執法若山人可近

守身如玉道能堅攤書未歇挑燈夜讀禮曾無閉戶錢
寂寞茅齋期再遇暫時相送上江船

次答丁勗菴

震澤南邊一碩儒西風相見此城隅奇書自識常三篋
重器人稱是六瑚古筆淋漓今作者壯懷蕭瑟老吾徒
十旬不雨心如醉無計畱君酒不觚

劉沛叔真贊

雙江戰血染朱輪五十年前卽此身剩有簞瓢歸陋巷
不勞名姓上麒麟

鬚眉不覺盡爲霜尙借戎裝作道裝肘後未曾離組綬

斗間猶自現干將

題靜像

善琴

一卷慵開獨坐吟不冠不義坐松陰天涯何患無知者
流水高山共此心

壽張方伯樞侯

金貂七葉向來傳身列崇班尙少年白簡有風存北闕
紫薇新澤滿南天樹人歲育三千士賑米朝糜百萬錢
猶說報恩懷未盡欲將心力更籌邊

無成六十鬢蕭蕭折柬空勞使者招古寺疎鐘陪永日
清齋長燭語良宵野人且可論三祝倦鳥何堪問九霄

愧乏嘉言供採擇平生蹤跡是芻蕘

送陳郡侯颺言

寶玉從來號此鄉臣心如水照穹蒼政閒只有圍棋客
官罷兼無養鶴糧顚守到時神爵集陶公歸日菊花黃
翳桑不少重生者泣送江邊幾萬行

送沈丹山入都補御史

博洽家聲有自來帝廷曾嘆沈郎才六年一令風零地
萬里重登市駿臺魯雉親人朝尙集鮑驄行步日方開
朝端引領瞻霜簡鵠首西風好爲催

送霍友山省觀春州

舟入盧溪秋已分西風吹葉落紛紛清波倚棹人如玉
中路看山石似雲衣綠每同昆弟舞學詩兼與及門聞
春州引望崆峒近鳴和天邊鶴一羣

次答宗人育璞

衡山西下洞庭東淚竹斑斑萬古同曾記狂歌荆國日
早將身拜舜皇宮采芝且免憂高蓋結柳何堪送五窮
知子共爲媯水後此心相喻不言中

題黃君球行樂

一樹濃陰號大椿白頭仍是綠衣身秋來太史占乾象
南極星中幾老人

百年世祿煥綸絲身隱新朝志未衰姓氏下邳橋上客
一篇仍似授書時

冬日承屈四會鳳山見過別後柬寄

短褐蒼涼曝早暄北風吹葉滿平原素絲忽望干旄色
白髮空慙負郭門一顧驛驅增壯氣片時酬酢奉高言
珠江湊水無多路雪裏郵詩敢憚煩

次答董漢竹

白頭逢世好佳句使人驚往事思先甲流年閑後庚老
餘家國淚交見死生情借問張平子何時賦二京
游蹤同雪爪世語半蘭奢各述先人舊彌增兩鬢華夙

興君不忝身外我何加愧乏江都筆名山勒一家

寄答馬臥仙都闢

秋日枉詩今未報窗外梅花開正闢君麾日駐海頭城
我老猶思雪中棹橫琴山外曉風清萬里滄茫見日生
高標銅柱千年在猶見君家舊勒銘君流膏澤周遐邑
已飢已溺常汲汲如何歌頌滿天南終日思歸時佇立
思親翹首望雲飛更許輕騎到小屏貧家客至無多地
已命山童拂釣磯

獨漉堂詩集卷之八

羅浮陳恭尹字元孝

小禹後集

補序

先子自編目錄自初遊至詩餘諸集始戊子拜恩迄戊寅小除皆經手定唯己卯庚辰未編至庚辰四月初十作送左督學詩是唯絕筆不孝賴等敬

按稿本次序不分體梓爲小禹後集庶誦詩論世者有所考焉

男賴識

立春日送黃蒲園謁選都門

初年車馬發河干
椒酒猶餘膝下懽
豈爲榮親須就祿

却緣行志在能官迎春綠仗舟前出新綠江山雪下看
京國舊多交好在雲司吟和共登壇

立春日送徐藝初御史歸吳門

東風此別未驚魂絳仗迎春騎吹繁幾處早花明水郭
一帆新綠去江村每因聲氣思疇曩願得雍容接晤言
驄馬暫留知不可六龍巡狩正南轍

寄王阮亭總憲

煌煌太微廷執法列其右夜來視星文光榮殊昔有聞
君掌蘭臺北向遙憑酒知己非獨懽蒼生望來久平生
恬澹志中立無所苟在德固罔愆於言良不朽由來風

紀地所尙非繩糾但令源本端足使民俗厚君家自青
齊先世屬台斗睿颺明盛日廓落經綸手繼起今有人
聯飛自相友看花歲最先勁柏凋彌後人稱獨坐三位
冠羣鄉九泥塗吾曳尾霄漢君驥首頗憶十年前春宵
同剪韭

次答吳彤本

老鳳巢邊和鶴鳴別來無念不繁縈水從庾嶺分南北
書寄楊州隔死生欹向文章元繼美紀羣先後見交情
不緣步屢能相過門徑東風長綠荆

陶奉長以大父仲調簡討文集見貽且請作傳次

其來韻二首

才既無雙數亦奇高鴻難慕羽堪儀長沙舊是陶公族
遺集重開晉義熙良璞不售多在楚靈珠無價本名隋
雖慙司馬藏山筆此志爭光自可推

此身終隱復何名應候哀吟自物情本爲詩書延一脉
偶從鋒鏑得餘生沈埋我愧干霄氣繼好君尋異代盟
正擬深談逢積雨把詩枯坐到三更

次答劉百原

九面湘流繞岳斜更乘山屐過丹霞誰分太乙仙人火
來問長貧孺子家南上柔條先着柳東風新律正飛葭

自憐黃髮同摩詰三徑荒蕪對五車

浮湘昔日有知音

謂郭幼隗

昨得清篇竟夕吟便續楚些齊

曠代更於蘭臭見同心鴈迴萬里衡陽峻海到三春島嶼
溪我老愧無娛客地一尊何以豁煩襟

寄壽何慎思邑侯

滄海起飛鴻黃鸝語曉風山光城外內水碧縣西東勝事
張燈復良宵聚酺同三時閒節序百戲走農工羔酒
公庭獻金章綵服通韶華官柳綠嘉燕燭花紅永譽神
明宰遐齡鶴髮翁大慈堪範俗善事卽移忠漢柱名方
重鄒苗雨正融部人歌令德矯首咏高崧

韶陽戰績詩爲閻將軍賦

百戰功高賊始摧九成臺下陳雲開天南父老猶能說作賦郎君只自哀

韶石芙蓉幾百峯石如甲冑是軍容直須青簡傳千載早有丹心徹九重

題行樂圖

拍手階前稚子嬉南園春色柳絲絲郎君修潔人如玉觸目琳瑯樂可知

此日能間卽是仙湘簾高捲竹風前諸童笑語還相和一部元音勝管絃

走筆送家雲石

南天積雨亂紅飛
嶺北山川綠尚希
莫戀長安爲客樂
駟車須念過橋歸

竹杖扶行擁敝袍
衰齡稀出豈云高
有人問我門前雪
雪在袁安兩鬢毛

寄祝張翁源泰亭

鴻名宿昔著關中鳬
烏今飛到粵東孝友世傳張仲在
文章人羨景陽工九成
樂奏高臺月百里花開昨日風
題柱盛名何以頌
早將霖雨慰宸衷

衰顏久矣絕逢迎
卜得山居却帶城方訝
里中驚駟馬

豈知門外駐千旌
雄談入座師資見

侯王阮

亭門人玉樹臨風

意氣生多謝文章
枉相屬江淹才盡老無成

沂澤得杖名以珊瑚索賦

珊瑚洲上叟有杖號珊瑚誰此瓊華贈如分若木株堅
貞人可比天矯畫難摹老脚今能健登山不用扶

送姚非漁選入國學

趙尉樓邊百草芳黃金臺畔柳初薰遙攜四百峯頭月
還就三千弟子行上國驛鷗爭道路六堂風雨盛文章
看君珥筆彤墀內不爲槐花更着忙

風流文采本翩翩萬里新行正少年鵬海片帆輕似翼

鶴峯春浪遠于天國門定有懸金覽家學先傳述德篇
若問阿翁膏澤地九華如黛大江邊

清明日同霍禹洲家大斌舟入高峽泊閩江樓下

卽事作

東風乘興好西行三月牂牁水尙清峽上篙痕穿石細
樓前山色極天橫花當令節千枝放酒酌長江百感生
五十年前龍見處白頭重說與諸卿

同禹洲大斌游七星巖作

灔湖西北石橋隈七十年中幾度來隔水似迷蓬島路
際天惟見墨雲堆神驅海岳星辰落穴走蛟龍洞府開

今昔登臨人屢換與君終日暫徘徊

寶月臺有作

高臺寶月舊莊嚴勝概登臨得盡兼積水有濤環四面
數峯如畫入重簷傳衣人遠空餘樹鑄鼎龍遙久墜鬚
世外世間何限恨愧無新賦擬江淹臺多苦提樹最古還隱端州諸山中十餘年乃開法

鼎湖山在高峽北皆臺上所見也

錦巖西菴同又札巨川雋斯汝侯

西菴清絕處一榻可棲禪石占閒房地雲過峭壁天只
疑居邃谷豈似在郊塵不待諸天供千花紅欲燃

壽霍朝望司諭

清齋遙隔故園波大耋今時鬢未皤東海有濶文壯闊
南山爲祝壽嵯峨宮牆數仞門庭峻桃李重陰子舍多
再世論交吾亦老贈君惟有一高歌

題納涼圖送吳石倉歸西湖次其卷中元韻

風柳高亭上諸賢共一僧暑同河朔避興似剡溪乘樂
事唯飛管羣書且架藤一時儒與佛誰得判淄澑

歸夢懸湖水經年度庾闢千篇新著作一卷舊家山自
子爲羈旅誰人醉此間荷花香有待掛席暑中還

石倉抄其鄉沈甸華處士所作先司馬及家文忠

張文烈諸傳見示再次前韻以謝其意

先傳勞抄示他年史所關文雖傳處士藏且在名山筆足參三立人堪並兩間無能酬厚意珠淚贈君還

仁和周氏節孝詩

誰言母有夫有夫中道歸黃壚誰言子有母有母生兒身不久母亡有母能撫孤夫亡教子成室家母之報夫在教子子能事生卽事死嗚呼節孝萃一門我欲歌之難爲言

左母 太君壽詩

翟茀霞帔綽有榮當年曾是慶長庚耄期尙授周公禮令子今題漢柱名畿內頌聲歌壽母堂前稱兕有門生

家園自足含飴樂不要孫曾捧杖行

高母 夫人壽

鸞冠翟茀映虹霓母德今時孰與齊
新澤近周炎海外門功曾建楚臺西
三春桃實成嘉燕千里名駒展駿蹄
身是慈雲敷不極佇爲霖雨慰蒸黎

題山帶遺畫爲鄭珠江

石邊叢菊晚香深澹墨淋漓惜似金
自是故人先有意報君一片歲寒心

次答歐上閑

飽聞風義十年前賴廣封疆幸接聯山有枝條原一本

溪流南北遂相懸霜蹄自合馳天路白髮唯堪守墓田
故友云亡高弟在指薪傳火古今燃

送吳漢公之都門

都門歸到正秋生半載遊蹤未暫停子舍始過梅子雨
枝間猶惜荔枝青薰風掛席三千里驛路題詩八百亭
江北江南須着眼六龍巡幸昨曾經

送秦番禺子芳

龍角山高絳水清循良真不愧家聲六年蒞政人無讐
一旦言歸淚滿城別浦有香流澤遠隨身唯雀去舟輕
白頭閉戶蓬蒿裏何日重瞻子子旌

題魯思亭小影

畫裏人殊少知名十許年兩行徽省樹一卷白華篇芒
屩聊爲爾苔階坐悄然凝思在佳句不謬世間傳

送秦欽文

作此無期別其如我老何雲山三晉遠朋好五羊多羽
翮宜軒翥圭璋在琢磨年年來去鴈莫忘繫書過

敢曰人倫鑒居然國士風超庭來杜甫清論得王戎學
繼河汾上詩多越嶺東妙齡今若此慚愧白頭翁

李裔袞壽

大隱高風世所知鬚眉奕奕有仙姿五千道德傳家學

三百唐宗是本支壽偶如賓偕白首諸郎佩印作人師
一堂盛事如何頌仙李盤根杜老詩

次韻送吳玉濤

散吏能爲汗漫遊輦牀書舫日乘流溯洞珠海沉香浦
吟望朱明大石樓政有弛張唯尙德文兼華實總成秋
歸來一賦人皆惜不獨吾儕有別愁

寄許伯玉

文章先代是宗工君有無雙國士風百戰功多滄海外
一官身老嶺雲東越庭詩禮皆能學愛客壺觴不說窮
鳳嶠松陰石湖月至今人想許中戎

方作寄潘紫登詩而其書適至卽事柬之

握手東風柳始黃榴花今已滿山堂正當念汝遺雙鯉
恰好來書到五羊遠道常時通夢寐把詩終日對琳瑯
自憐白首論交久獨有斯人具肺腸

送家恭尙

羚羊峽裏共高歌秋月春風幾度過策蹇偶尋銅柱路
採驪曾涉海門波帆檣又作經時別杯酒其如易醉何
猶是塞鴻飛到處天涯莫厭寄書多

先始祖祠宇改建初成承宗戚諸公賜祭卒賦一

律志謝

事遠難銘魏氏鐘手栽猶見大夫松未離故寢成新廟
且喜開門對一峯顧我垣墉書闕畧勞君升降禮雍容
先朝遺俗吾鄉在厚意淡慚報莫從

劉仰山招同吳玉濤梁藥亭家岩侯雨中汎舟半

塘遲沈虹石不至同用八庚

急雨無朝暮篙師不敢行人爲長夏會天與片時晴洲
渚烟中市雲山畫裏城幾年離別緒都向酒杯傾

曲港乘潮入輕舟與岸平村童驚客語江鶴避棋聲柳
浪家家似荷珠葉葉并所思期不至八詠且同贊

朱玉樹以畫梅見貽賦謝

玉堂仙子玉鬢鬚老筆能飛屈鐵枝正是雪消明月落
羅浮山下夢醒時

晤楊春州止菴於五羊翌日拜良醞之惠賦此奉
謝

快瞻風度從今日得讀文章已十年趙尉臺邊懷古地
崆峒巖下早秋天鳥飛霄漢來容易邑有神君望儼然
一席高談人已醉醇醪貽我意兼傳

夏杪楊寶生孝廉招同毛行九司馬楊止菴大令
梁藥亭太史飲於風幡堂次行九韻二首

古樹餘千載勞生又半年閒尋白社約得醉綠陰邊蟬

試迎秋噪庭分欲暮烟是間宜野酌何必肆長筵

寺有菩提

樹婆羅果樹
皆子載物

吳越同星紀登臨具上才一時萍跡合千里鴈行來幡影留飛刹池光照舉杯白頭希樂事今日老懷開

過鄒左俞園林

了無紛雜絕纖埃有此園林倚粵臺高柳夾門行徑永
小橋橫水畫堂開坐疑古洞迷秦晉日見漁舟自去來
況是主人鬚未白官閒時得掃蒼苔

沈左臣惠墨竹賦柬五首

一天烟靄何方雨滿徑勞憇昨夜風中有高人呼不出

早鶯飛處月瞳瞳

數竿濃淡復縱橫靜對蕭蕭似有聲若使伶倫知採伐
不妨吹作鳳凰鳴

老幹欹斜折復萌小枝還作怒龍形等閒自寫凌霜節
不待他人紀汗青

大筆如椽勢莫當節間一丈末如芒君家越志分明載
月落空庭影未長

沈懷遠南越志
載竹種甚多

酷暑經時只掩扉勞君貽贈有苦磯蕭然四壁如常日
嫋嫋西風葉自飛

次答張損持太史

蓬蒿三徑謝芳蓀軒蓋何期枉見存憶鱠幾時歸海上
吹簫曾記到吳門斗牛劍合元同氣南北潮生各異痕
猶有一人知己在五羊城下舊虞園

名成仍復愛三餘香水溪邊更結廬養疾舊承天子詔
傳家元有老人書游多勝賞頻高會世誦新篇滿比闈
山月漸涼清露下小園秋草欲教除

閏七月二日長壽石公招同毛匏邨司馬張損持
吉士吳晉濤少尹楊勉菴孝廉唐海門黃蘭偶
司紅遲諸文學雅集離六堂次毛韻二首

十二欄干砌碧瑜四周流水入縈紆似登海蜃烟中閣

同探驪龍領下珠吳越提封餘一覽人天境界豈云殊
遙檐漸有涼風入覓句徐行得自娛

開社東林事已頻曾將妙偈伏龍神多金布地來殊國
古木含風不記春暑後溪山初過雨閨餘鴟鵲再臨津
賦詩此日多豪俊莫笑衰頽白髮人

閏七夕後一日遠公招同潘稼堂張損持梁藥亭
毛行九余未及赴諸公分韻見及得心字

四序遁以迫天宇皛且淡出郊睇平疇上有嘉樹林蕭
蕭風乍勁萋萋歲已陰初秋屬餘閨徂暑方流金駕言
梵王宮闈寂期幽尋相招有開士散帶遺冠簪登樓俯

逝川推窓納遙岑
稍歇人外磬復聞
花中琴追隨昔已
屢違隔忽在今
空齋散文史席地
聊歌吟豈惜車馬勞
若爲塵累侵羣公
不遐棄往往遺之音
其清若冰雪有美如
璆琳誰言一日遊
逖矣千載心

題張損持太史行樂圖

跏趺秋樹根悠然
靜餘想本爲著作
人具此幽遐賞十年
臥滄洲鬚髮漸云長
不以三事榮易我一日
養蒼生望正殷林泉
聊獨往新篇歲峥嵘
舊聞入羅網高風激
頽波苔石皆蕭爽
五弦何必揮瀑流有清響

初秋日梁藥亭招同沈詹山大令家山農隱君潘

稼堂檢討張損持吉士毛行九司馬吳晉濤少

尹林桐叔少府楊勉齋孝廉徐紫凝羅浮山司

紅遲家獻孟諸文學遠布心月二上人雅集六

瑩堂分得阡字

君不見素馨田行人採摘成術阡又不見菖蒲澗仙人
服食今無傳世間不貴長生學只愛花香耳目前吹笙
繫鼓日縱飲笑殺吾儕無酒錢藥洲南邊杜門者今日
忽然羅衆筵相邀盡是文章客吳山越水多英賢盈階
况復美花竹梧桐一葉初秋天火雲燒空尙炎赫江湖
白浪高於船千里命車良不易兼旬何意成流連西郊

北郭多古寺菜根茗椀同枯禪長吟短句屢酬醉千鍾
百榦無聞焉主人家醞號元碧奇方得自安期仙飲酣
棋罷各授簡鵠鵠大硯青松烟傾玉琰拂華牋勸君大
醉方謀篇良儔嘉會不盡興異日相思年復年

次和梁疊石髮塾詩

所愛寧容易慈言况共持髮膚原一體長短幾千絲塔
與盧能並峯連婺女奇誰憐頭頂上霜雪已垂垂

口占送徐紫凝

掛帆江上試新涼纖月依微帶夕陽想見孤山風落木
夢魂無夜不家鄉

每逢岐路一沾巾五嶺東西幾度春游子本爲歸養計
故山無復倚閭人

懷吳正憶浮瓜侯訪戴還須掉雪舟君見二君煩致語
白頭難復到杭州

贈沈詹山

一尺長鬚已皓然目如巖電古稀年南中久住丹砂令
海外曾歸玉局仙老驥未忘歌伏櫪高鴻何必志摩天
時來漸有西風入好讀磻溪卜獵篇

呈馮太守

得依仁政已三年曾奉高設接綺筵五馬清風珠海上

滿輪明月桂花前今時地望誰能及往日詩篇世共傳
家有傅巖三命在卽看霖雨到中天

贈雲在青

忙中常自領閒機鬚鬢年來白漸希過客不時停玉勒
高窓長日撫金徽清池映竹留青靄恠石當門掛薜衣
秋好正宜將壽酒卽看庭下鳳雛飛

贈黎普濟

慈心到處有奇方苦海逢君便得航世上瘡痍非一日
分身須是上巖廊

送高少府

板輿遙向帝都回遠送于南彩鷁開秋月上弦滄海外
西風行部峽山來鴈行比翼排霄漢菊蕊延年入壽杯
白首狂歌杜陵老題詩唯羨達夫才

重陽前五日高中含司馬招同劉卓崖主考屈四

會鳳山張廣寧鶴洲楊陽春止菴錢茂名蔗山
張翁源泰亭高東莞菜園田英德克五雅集雲

半閣時闡事初竣

使車高蓋總能來雲裏軒窓俯粵臺秋水滿前人自照
碧天無際鴈初回酒邊赤葉迎風醉閣後黃花傍節開
白首疎狂虛授簡愧無詩句可追陪

寄潘函觀

三年別日未云多甲子於君忽再過白髮到來皆若此
青山歸計近如何久無薇蕨留孤竹牋有松楸廢蓼莪
只隔嶺梅南北路一枝相寄且爲歌

生生圖送家山農歸雲間

偏舟歸去嶺梅初久住天南綽有譽慈幼近開三畝宅
活人曾著十年書竹籬透石冬抽筍池水通潮晝躍魚
不敢相留唯有願到秋遙望再來車

己卯八月十四日五羊城南聯句同毛端士司紅
遲梁藥亭張損持同拈十三職韻

地勝秋亦佳

毛人間醉常得深簾郤花影

陳欹檻上苔

色涼雲淡不飛

司白日光稍匿是時月幾望

梁平分景

未昃天空肅萬象

張

霄迥聯千翼過水割明沙

毛排闥

覲爻國江城霸氣散

陳

海甸瘴煙熄舟通珊瑚宮

司星

定女牛域黃屋竟何在

梁

青袍此相卽同遊皆妙選

張

抽思盡奇特揮灑衍波箋

毛

淋漓客卿墨長驅役今古

陳清辯洗雕飾凡案雜古歡

司

杯盤列珍食酒斟羅浮

春梁果擘詞梨勒客身翻奪主

張

南風競凌北豪吟捲

宿霧毛深坐催宵刻風戰矮簷梧

陳

漏侵園院棘規月

欠微痕司清輝渺無極林棲鳥忽驚

梁

穴處鮫猶織大

地漫金波

張虛府

敞瓊闈露冷吳剛斧

毛飈駛纖阿軾

桂華一以覩

陳

蓬梗嗟未息昨泛海珠濱

司

頻過花田

側千門連睥睨

梁

萬頃瀉胸臆浩蕩鷗難馴

張

淒清蛩

更唧雄劍倚芙蓉

毛

枯禪寄簷菊各抱千載心

陳

寧虧

九鼎力高潔慕蟬飲

司

齷齪笑雞肋履道任夷惠

梁

得

句驚藉湜良會永弗忘

張

先民念遺則

毛

題吳山帶墨竹送吳晉濤歸宜興

故人筆墨醉方工數葉垂垂亦不同畫裏只今成舊雨
畫溪歸去是春風

別意何如紙上禽一飛一宿本同林憑君折取伶倫管

吹作陽和覘曉音

得王立安訃音哭之

把書終日恨難平歎息修文召已成督亢陂前新宅兆
羅浮峯下舊師生三年已罷升堂瑟萬里難伸自牖情
愛汝是翁知是我只應南北各霑纓

朗吟終日捋虬鬚七尺昂藏好丈夫五字號城真莫敵
百弄爲咏只須臾行雖越衆偏能怒文不求名祇自娛
憶雪樓前風雨散不堪扶杖過豐湖

金丹煉就誰人識玉樹埋來恨有餘幾日已爲黃壤客
昨朝猶見白門書家懸兩地星霜久膝繞諸郎象勺初

未後數言殊了了前身應得悟真如

題吳山帶墨菊爲潘受平

清姿妙筆已難期身後珍如玉樹枝最是稜稜霜下菊
贈君不少故人思

寄題家健夫西峯草堂

不同吟醉幾經冬燕鴈頻頻過越封老去未曾忘北路
人來多是說西峯詩情日與年華長酒債全教筆硯供
特遣兒曹識堂徑天涯癡叔也如儂

勵兒北上口占示之

吾衰良已甚汝往慎前途一騎過河岳扁舟下楚吳眼

中新白雪夢裏古皇都最是英賢會同聲自不孤

文章先世業用舍百年身送爾無他語思爲不朽人舊
山叢桂老去路杏花春倘謝經生籍韋編正好陳

勵兒行後連有南風漫成

江邊別汝意忡忡十日南風爲送行風度有樓今在否
計程應到曲江城

贈李彌樸

曾稱祭酒老儒門鄰曲過從歲獨尊派自有唐三百祀
家傳苦縣五千言詩書善述斯爲達宗祐能修賴有孫
紫閣玉泉多勝地百齡期爾醉鄉園

正月三日過潘子登所寓江樓龔渭臣載酒與潘

木公諸君雅集賦潮平兩岸闊分得涯字

千檣不動水漣漪共上江樓好賦詩塵世百齡希暇日
滄波開歲是閒時漸鋪浦澈平如練益覺乾坤未有涯
破浪搏風年少事白頭唯有一銜卮

次韻答龔渭臣

七十餘生漸有涯長繩何計繫奔曠猶能鼓枻滄浪外
不厭逢君唱和遲海鳥化來知大翼鬚看漸覺愧男兒
東風共醉屠蘇酒俯仰江樓極二儀

正月六日將歸錦巖泊舟潘子登寓樓下新月甚

佳因留宿三日雨登斯樓亦一快也

偶爾停舟快不勝江樓今夕又同聲故園歸去逢人日
新月何期對好朋竹榻朗吟茶讌罷低窓高掩浪紋升
頻年衰疾希行往如此良宵得未曾

羽都督殉節詩

諱鳳麒字冲漠明廣州四衛指揮死庚寅之難

金方爲教本堅剛受命先朝衛五羊生死只知城下士
姓名不憚羽林郎血流太地終成碧骨化飛塵久亦香
世祿幾家能矢報爲君歌此問蒼蒼

寄何慎思順德

新年頻不值舟檝各西東夜月同江上春燈憶縣中潮

生環郭綠綵舞間花紅請以無疆兕因君獻若翁
東風開萬堞身坐百花間大邑人希暇平心政自閒寢
興承白髮廳事對青山並報君親重恩酬鬢未斑

送湯建孟之永明

白頭游興亦雄哉三楚烟花二月開九十甘泉曾若此
祝融峯頂去還來增城湛文簡九十三尚游南岳

永明潛邸萬峯前君見荆榛亦黯然不及鍾祥龍起地
至今人尙說承天

送家昭德之官長寧

片帆春色上循州二月東江浪尙柔薄俸未能離苜蓿

一官重得對羅浮峯雲佳處同誰賞桃李蹊前與士游
倘到東坡亭下泊老夫還擬共維舟

送左襄南督學試竣還都奉命命視河

我聞丹山赤水之洞天地脈暗與蓬瀛連蓬萊一枝乃
獨往直到天池鵠化之南邊倏然乃與羅浮結七洞四
明如隔絕寧知共在斗牛間天上分星總揚越四明狂
客賀季真青蓮一見號仙人知人自有傳心法能使汾
陽屈者伸唐代功臣獨居首誰知活自書生手君今相
士特南來知人肯落前賢後天閑新進渥洼多更命旌
旗理九河都將吉甫清風頌和入河渠瓠子歌著書七

十羅浮老汗竹爲書頻削稿方候公閒細評論如何
鵠首催前導病中相送不成章日授兒曹寫數行遲君賜
歸鑑湖一曲水來問天台萬仞之石梁